



武
38
卷

丹臺樋口先生著
西臯菊池先生校

醫國林蒙求

江戸書林

鴨伊兵衛梓



醫國林蒙求序

覃十七八時始見叔成季成子青山
詞社叔溫潤澹雅季機鋒秀拔皆
未易才也此幾叔仕紀藩已致青雲
季好方事肥後侯卜居於城南品川
醫道大行奔走之餘誦讀不倦采摭
古今醫事著醫國林蒙求三卷將以
便童蒙為其為書也此論正史外

紀殘編斷簡凡事涉方位者揆拾
靡遺屬韻分註意亦勤矣雖然足
瑣者已大業未成宿志未酬不幸
溘焉子今十餘宿草矣博甫者叔
之嗣而季之姪也家學夙成書香
馥郁以季交叔季之最故也徵序
於季之少也不如叔季今也老矣
辛酉監銅浪辛甲子又從崎嶇息偃

不遑交事終如顧視舊業恍如隔世
而叔成嘗為覃作先人墓碑曰子報
好學與余有旧如貫之誼過骨肉也
則不可辭以不敏也季成雖逝矣有
兄有姪侯斯書不朽者抑亦不幸中
之幸也老夫之言何足以輕重斯書
矣頃者清醫胡兆新者來子崎陽
視病授方名噪一時乃至於東都

三官醫來質於問恨不令起季來于
九原而送一雞也草為之悵然
文化二年乙丑花朝江戸大田掌
書於瓊浦客舍



醫林蒙求序



嗚呼世之富人輒踴於此奔走
於彼終身僕之以此斃者有之若
其有餘力者放浪飲食沈溺僕
倡者有之其能超然有雅想者
其與幾人余景至江都也得極
口香成驩焉屬古來法季成善

詩居業之餘獨坐於一室之中
風咏自適非有卓拔之志焉能
如此哉一日出一冊示之曰碩師
老手動口古人然問之則不知
其何代人又不諳其何等人蓋無
臺觀之習是以白首茫然我亦切憂
焉故有此作甚於育樂強也未

必無一助矣余一閱之凡係屬
事者固所歲畫可謂勤矣
余乃曰善哉子之造也醫籍果能熟
之則能成其羽毛他日將一舉
千里身成軀然而哂爾來五
年余又至江都身成既沒其
嗣元貞屬序於余余既善身

成之為人又追思前言心乃戚
戚焉不可不以爲遠題以斯
言

然府

大城修



醫林蒙求自序

自有蒙求書以來後世續作者
不爲少也特怪吾醫之先輩曾
無傲焉余固陋不自揣選裁歷
代諸名公事蹟史傳及小說雜
錄所載諸涉醫事者押以聲
韻凡三百六十句編爲小冊

子命曰醫林蒙求將以授兒
曹也余業無餘暇書之聚藏
恐蒐羅未盡追琢不全也屬
者有客曰嘗見醫學蒙求者
余聞之曰夫禮戒雷同文辱
蹈齷前既有其書何必改作
况掩彼美見此醜乎將摹稿

火之客曰無傷也其為書句無
對偶音韻不協似失安平家法
且引援事辭亦多錯謬比子
所輯大有迥庭庸何傷矣余
因索其書後得諸江東之布
披閱一過而信客言不誣也
若夫並存則觀者自擇焉

丹臺 槓口器識



菊池元習謹書



Faint bleed-through text from the reverse side of the page.

醫林蒙求凡例

一此編李父丹臺先生所著標題三百六十句而止別無結末今不自度綴四句以續之雖似玦珣補玉缺姑倣李氏之體亦繼季父之志云

一屬辭比事固尚典確然疾痰藥石事或不雅馴此編要資于搜索所以不淘汰也

一此編掌故未全脫稿而撮要乃備矣若夫上列歷代之名云漢云魏下載證書云某云某皆從原稿不敢叨裁畧焉然事冗文繁則剔重複正異同其餘足助引證者一二標注之以便校閱而已

一校書之難博覽家猶病焉此編所引用經史百家或屬漢魏叢書津逮秘書說郭學海等所收入未遑盡講究也苟意通事折而無害於義則止矣其他醫籍居半亦余平生所不熟雖畧辨魯魚乎錫錫蟹螯猶將多也覽者恕諸

文化改元夏五月

菊池元習謹識

醫林蒙求卷上

標題

岐伯天師	倉公國工	孟詵鳳閣	思邈龍宮
董奉杏林	弘景松風	許遜竹下	范汪園中
扁氏脉書	桐君藥錄	朔獻三露	鄭註五毒
封衡玄丘	子信白鹿	王冰啓玄	葛洪抱朴
伊尹湯液	張機法方	高強折肱	俞附沆腸
無功東臯	之範西陽	王氏懶走	高生鬼藏
伯宗徒癰	趙泉工瘡	孫肪四休	僧垣三縛
元方白鼈	言吉黃雀	二家辨瘡	三僧論脚

胤宗一藥	無擇三因	上善大素	元起始訓
法善鐵鏡	惟德銅人	皇甫守一	混康葆真
壽光鷓息	吳普禽戲	周順杉木	嗣明交穩
可久啓蒙	無已明理	子儀脉神	子莖醫意
巫咸鴻術	伯祖大譽	知藏登牀	道度乘輿
誠齋芋子	彥伯鯉魚	朱肱百問	陶華六書
張華三藥	褚澄四養	陸宣哀書	范文比相
蘓耽橘井	馬湘竹杖	劉觀安對	符生亾狀
張療聲病	頌記面瘡	劉尋正俗	周憲救荒
中光布袍	居中紙囊	公度氣海	莊綽膏育

元化一卷	越人三治	王碩易簡	彥修格致
吳大神授	何澄帝賜	公茂官祭	蔣武賜諡
胡洽虛靜	杜度冲深	孫兆四物	海淵一鍼
立興授瓢	世仁撫衾	慶嗣與米	潤芳懷金
吉老煎冰	克明熾炭	汪機會編	江攢類案
王微倦遊	李調擣散	程婢放鼈	王生握蒜
嗣伯死枕	安常囚繩	藏用斗火	陳承盤冰
可大奇勝	劉基多能	寄奴收藥	首烏服藤
知己水解	文潛粥記	朱公解毒	許氏救縊
文摯激怒	郝允怖悸	張辨青囊	王得金匱

醫林典故 卷之十一 醫學彙考

肥後 樋口器季成 撰
 紀府 菊池元習博甫 撰
 岐伯天師 倉公國工

醫林蒙求卷上

肥後

樋口器季成

撰

紀府

菊池元習博甫

撰

岐伯天師

倉公國工

岐伯黃帝臣也帝使岐伯嘗味草木典主醫療疾經

方本草素問之書咸出焉帝王世紀天師岐伯也素問次註

漢太倉公者齊太倉長臨菑人也姓淳于氏名意少

而喜醫方術高后八年更受師同郡元里公乘陽慶

慶年七十餘無子使意盡去其故方更悉以禁方予

之傳黃帝扁鵲之脈書五色診病知人死生決嫌疑

定可治及藥論甚精受之三年為人治病決死生多
 驗初間留川唐里公孫光善為古傳方即往謁之得
 見事之受方化陰陽及傳語法悉受書之意欲盡受
 他精方公孫光曰吾方盡矣不為愛公所吾身已衰
 無所復事之是吾年少所受妙方也悉與公母以教
 人意曰得見事侍公前悉得禁方幸甚意死不敢妄
 傳入居有間公孫光問處意深論方見言百世為之
 精也師光喜曰公必為國工史記

孟詵鳳閣

思邈龍宮

唐孟詵者汝州梁人擢進士第累遷鳳閣舍人他日

至劉禕之家見賜金曰此藥金也燒之火有五色氣
 試之驗神龍初致仕居伊陽山治方藥睿宗召將用
 之以老固辭賜物百段詔河南春秋給羊酒糜粥尹
 畢構以詵有古人風名所居為子平里開元初卒年
 九十三嘗語人曰善言不可離口善藥不可離手唐書
 撰補養方必効方各三卷又著食療本草三卷張鼎
 補其不足者八十九種合為二百二十七條醫說
 唐孫思邈偶見牧童傷小蛇脫衣贖而救之旬日出
 遊白衣少年拜謝曰吾弟蒙道者所救邀思邈至家
 金碧炳耀儼若王者之居見一人裕帽絳衣侍從甚

多謝思邈曰深蒙道者厚恩因指一青衣小兒云前者此兒出為牧豎所傷賴道者脫衣贖救得有今日潛問左右此為何所對曰此涇陽水府也絳衣王者命設酒饌妓樂宴思邈辭以辟穀服氣乃以輕綃金珠相贈思邈堅辭不受乃命其子取龍宮奇方三十首與思邈曰此可以助道者濟世救人復送歸思邈以是方歷試皆効編入千金方中列仙傳

董奉杏林 弘景松風

董奉字君異侯官人為入治病不取錢物使病愈者為種一株杏數年有十萬餘株鬱然成林杏子大熟

奉於林中作倉宣語欲買杏者但自取之一器穀得一器杏每穀少而取杏多者有虎逐之有偷杏虎逐之不敢欺奉以所得糧穀賑救貧窮供給行旅居民間僅百年乃昇天顏色常如年三十時也神仙傳
 梁陶弘景字通明丹陽秣陵人也祖隆王府參軍父貞孝昌令初弘景母郝氏夢兩天人手執香爐來至其所已而有娠以宋孝建三年庚申歲夏至日生幼有異操年四五歲恒以荻為筆畫灰中學書至十歲得葛洪神仙傳晝夜研尋便有養生之志謂人曰仰

青雲觀白曰不覺為遠矣父為妾所害弘景終身不娶及長身長七尺七寸神儀明秀朗目踈眉細形長額聳耳耳孔各十餘毛出外二寸許右膝有數十黑子作七星文讀書萬餘卷善琴棋工草隸未弱冠齊高武作相引為諸王侍讀除奉朝請雖在朱門閉影不交外物唯以披閱為務朝儀故事多所取決焉永明十年脫朝服挂神武門上表辭祿詔許之賜以束帛敕所在月給茯苓五斤白蜜二升以供服餌及發公卿祖之征虜亭供帳甚盛車馬填咽咸云宋齊以來未有斯事於是止干句容之句曲山恒曰此山下

一本作挂冠

梁書陵作壇

是第八洞宮名金陵華陽之天周回一百五十里昔漢有咸陽三茅君得道來掌此山故謂之茅山乃中山立館自號華陽隱居人間書禮即以隱居代名弘景為人員通謙謹出處冥會心如明鏡遇物便了言無煩舛有亦隨覺永元初更築三層樓弘景處其上茅子居其中賓客至其下與物遂絕唯一家僮得至其所本便馬善射晚皆不為唯聽吹笙而已特愛松風庭陰皆植松每聞其響欣然為樂有時獨游泉石望見者以為仙人性好著述尚奇異顧惜光景老而彌篤尤明陰陽五行風角星算山川地理方圓產物

醫術本草天監四年移居積金東澗弘景辟穀導引之法自隱處四十許年年逾八十而有壯容仙書云眼方者壽千歲弘景末年一眼有時而方史南許遜竹下 范汪園中

許遜字敬之號真君南昌人吳赤烏二年母夢金鳳脚珠墜於掌上玩而吞之及寤乃腹痛因是有娠而生真君生而穎悟姿容俊偉少小踈通與物無忤尅意為學博通經史明天文地理音律五行讖緯之書尤嗜神仙修煉之術聞西安吳猛得丁義神方乃往師之悉受其秘又歲大疫死者十七八真君以所得

神方拯治之符咒所及登時而愈他郡病民繼而至者日千計於是標竹於郭外十里之江置符水於其中使就竹下飲之皆瘥列仙傳

晉范汪字玄平雍州刺史晷之孫也父稚早卒汪少孤貧六歲過江依外家新野庾氏及長好學外氏家貧無以資給汪乃廬于園中布衣蔬食燃薪寫書寫畢讀書亦遍遂博學多通善談性理晉書性仁愛善醫術嘗以拯恤為事凡有疾病不以貴賤皆治之所活十愈八九晉中興書著范汪方百餘卷名醫別錄

扁氏脈書 桐君藥錄

醫林典故

卷之二

五

醫學叢書

扁鵲者黃帝時醫也定脈經療萬姓所疾帝與扁鵲論脈法撰脈書上下經漢志有扁鵲內經九卷外經

十二卷神仙通鑒

桐君者黃帝時臣也撰藥對四卷及採藥錄說其花葉形色論其君臣佐使相須至今傳焉本草經序論

朔獻三露 鄭註五毒

漢武帝時有吉雲國出吉雲艸食之不死日照之露皆五色東方朔得玄青黃三露各盛五合以獻於帝賜群臣服之病皆愈朔曰日初出處露皆如飴令人煎露如飴又服不饑洞冥記

周禮天官瘍醫掌腫瘍潰瘍金瘍折瘍之祝藥副殺之齊凡療瘍以五毒攻之鄭玄註云五毒五藥之有毒者今醫方有五毒之藥作之合黃堊置石膽丹砂雄黃礬石慈石其中燒之三日三夜其煙上著以雞羽掃取之注創惡肉破骨則盡出周禮

封衡玄丘 子信白鹿

封衡字君達隴西人也幼學道得其訣號青牛道士服黃連五十年入山採藥百餘年還鄉里如年三十者常騎青牛聞疾死者無識與不識以藥治之應手而愈魏武帝召問養生大畧衡曰減思節嗜慾而已

所著有養氣術隱形法衛生經數十卷後入玄丘山仙去列仙傳

齊張子信者河內人也頗涉文學以醫術知名恒隱白鹿山時出遊京邑甚為魏收崔季舒所重太寧中徵為尚藥典御武平初又以太中大夫徵之聽其所志還山又善易筮及風角之術北史

王冰啓玄 葛洪抱朴

唐王冰者號啓玄子寶應中為太僕令篤好醫方精通素難得舊藏之卷次註素問八十一篇別作玄珠密語其大要皆論五運六氣皇極經世註亦載其語

又撰天元玉策三十卷年八十餘以壽終醫史

晉葛洪字稚川丹陽句容人也少好學家貧躬自伐薪以買紙墨夜輒寫書誦習以儒學知名性寡欲無所愛翫不知棋局幾道閉門却掃未嘗交游惟尋書問義不遠千里期於必得遂究覽典籍尤好神仙導養之法從祖玄吳時學道得仙號曰葛仙公以其練丹秘術授弟子鄭隱洪就隱學悉得其法焉後師事南海太守鮑玄玄亦內學洪傳玄業兼綜練醫術凡所著撰皆精覈是非而才章富贍洪年老求為勾漏令遂行至廣州刺史鄧嶽留不聽去乃止羅浮山鍊

丹在山積年，漫游閑養，著述不輟。所著子言黃白之事，名曰內篇，其餘駁難通釋，名曰外篇，大凡內外一百一十六篇，雖不足藏諸名山，且欲緘之金匱，以示識者。自號抱朴子，因以名書。又著神仙良吏隱逸集異等傳各十卷，方伎雜事三百一十卷，金匱藥方一百卷，肘後要急方四卷。後忽與嶽疏云：當遠行，尋師，刻期便發。嶽狼狽往別，而洪坐至，日中兀然若睡而卒。嶽至，遂不及見。時年八十一，視其顏色如生，體亦柔軟，舉尸入棺，甚輕，如空衣。世以為尸解得仙云。晉書

伊尹湯液 張機法方

按事物紀原云：伊尹，湯也。作湯液，經名醫圖云：伊尹，五帝時人在巫咸之次。

伊尹以亞聖之才，撰用神農本草，為湯液。甲乙經序後漢張機，字仲景，南陽人也。學醫術於同郡張伯祖，盡得其傳。工於治療，尤精經方。遂大有時譽。漢靈帝時，舉孝廉，官至長沙太守。少時與同郡何顥、客遊洛陽。顥探知其學，謂人曰：仲景之術，精于伯祖，起病之驗，雖鬼神莫能知之。真一世之神醫也。嘗見侍中王仲宣，仲景曰：君年至四十，當有疾，鬚眉脫落。脫落後，半年必死。宜豫服五石湯，庶幾可免。仲宣時年二十餘，聞其言，惡之，雖受方而不飲。居數日，復見仲景，乃佯曰：五石湯已飲之矣。仲景曰：觀君氣色，非飲藥之

醫學類聚 卷之五 醫學

診何輕命欺人如此邪仲宣益深惡之後二十年果
 有疾鬚眉皆脱落越一百八十七日卒時人以為扁
 鵲倉公無以加之也仲景宗族二百餘口自建安以
 來猶未十稔死者三之一維時大疫流行而傷寒死
 者居其七乃著傷寒卒病論十卷行于世蓋推本素
 問大論之旨兼演伊尹湯液而為之探頤鉤玄功俾
 造化華陀讀而善之曰真活人之書也仲景又著金
 匱玉函要畧方三卷上卷論傷寒中卷論雜病下卷
 載其方並療婦人寔為千古醫方之祖自漢魏以迄
 于今海內醫者家肄戶習讀誦不暇如士子之於六

經然論者推為醫中亞聖史醫張仲景傷寒論總十卷
 二十二篇証外合三百九十七法除重複定有一百
 一十二方今請頒行傷寒論新
校正序

高強折肱 俞跗浣腸

齊高強曰三折肱知為良醫左傳

上古之時醫有俞跗治病不以湯液醴灑鑿石橋引
 案杭毒熨一撥見病之應因五藏之輸乃割皮解肌
 訣脉結筋搦髓腦揲荒爪幕前浣腸胃漱滌五藏練
 精易形史記

無功東臯 之範西陽

醫林蒙求 卷之十一 醫學

唐王績字無功，絳州龍門人，性簡放，不喜拜揖，兄通知績，誕誕不嬰以家事，鄉族慶弔冠昏不與也。大業中授秘書生，字不樂在朝，求為六合丞，以嗜酒不任。軍還鄉里有田十六頃，在河渚間，有奴婢數人，種黍，春秋釀酒，養鳧雁，時藥自供，以周易老子莊子置床頭，他書罕讀。遊北山，東臯著書自號東臯子。唐書採藥詩云：野情貪藥餌，郊居倦蓬華。青龍護道符，白犬遊仙術。腰鑿戊己月，負鋪庚辛日。時時斷嶂遮，往往孤峰出。行披葛仙經，坐檢農皇帙。龜蛇採二苓，赤白尋雙木。地凍根難盡，聚枯苗易失。從容肉為名，薯蕷膏

橫遮一作

成質家豐松葉酒器貯參花蜜且復歸去來刀圭輔

衰疾唐詩紀事

徐之範者北齊及後周人之才弟也亦以醫術知名

官至太常卿襲兄爵為西陽王周書

王氏懶走 高生鬼藏

宋人王纂海陵人少習經方尤精鍼石遠近知其盛名宋元嘉中縣人張方女日暮宿廣陵廟門下夜有物假作其婿來女因被魅惑而病纂為治之下一鍼有賴從女被內走出病因而愈異苑

渤海高生病臆痛不可忍召醫視之醫曰有鬼在臆

中藥亦可療。煮藥飲之。吐痰斗餘。膠固不可解。刀剖之。有一人自痰中起。初甚么麼。俄長數尺。倏忽不見。鬼藏臆中。已奇矣。而知臆中鬼者。亦神手也。不著其名。惜哉。此與孫藏頸樂神藏鼻中。何異。宣室志

伯宗徒癰 趙泉工瘡

南宋薛伯宗善徒癰疽。有公孫秦者。患背癰。伯宗為氣封之。徒置齋前柳樹上。明旦癰消。樹邊便起一瘡。如拳。大稍稍長。二十餘日。瘡大膿爛。出黃赤汁斗餘。樹為之痿損。南史

晉趙泉不知何許人。性好醫方。拯救無倦。善療衆疾。

於瘡尤工。為時嘆服。醫說

孫昉四休 僧垣三縛

宋孫昉字景初。為大醫。為士大夫發藥多。不受謝。自號四休居士。山谷問其說。四休笑曰。麤茶淡飯飽。即休。補破遮寒暖。即休。三平二滿過。即休。不貪不妬老。即休。山谷曰。此安樂法也。夫少欲者。不伐之家也。知足者。極樂之國也。因作詩。遣家童歌之。宋史

姚僧垣字法衛。吳興武康人。吳太常信之。八世孫也。曾祖郢。宋負外散騎常侍。五城侯。父菩提。梁高平令。嘗嬰疾歷年。乃留。心醫藥。梁武帝性又好之。每召菩提。

四休之
事出黃
山谷文
集

提討論方術言多會意由是禮之僧垣幼通洽居喪
 盡禮年二十四即傳家業梁武帝召入禁中面加討
 試僧垣酬對無滯梁武帝甚奇之金州刺史伊婁穆
 以疾還京請僧垣省疾乃云自腰至臍似有三縛兩
 脚緩縱不復自持僧垣為診脉處湯三劑穆初服一
 劑上縛即解次服一劑中縛復解又服一劑三縛悉
 除而兩脚疼痺猶自孱弱更為合散一劑稍得屈伸
 僧垣曰終待霜降此患當愈及至九月遂能起行周書

元方白鼈

言吉黃雀

隋巢元方云昔曾有人共奴俱患鼈痕奴在前死遂

按白馬
 尿消瘕
 神見搜
 神記

破其腹得一白鼈仍故活有人乘白馬來看此鼈白
 馬遂尿隨落鼈上即縮頭及脚尋以馬尿灌之即化
 為水其主曰吾將瘥矣即服之果如其言得瘥病源候論
 唐金州防禦使崔堯封有親外甥李言吉者左目上
 臉忽癢而生一小瘡漸長大如鴨卵其根如弦恒厭
 其目不能開堯封每患之他日飲之酒令大醉遂割
 去之言吉不知覺也瘡既破中有黃雀鳴噪而去奇聞錄

二家辨痘

三僧論脚

宋以來痘之專家者曰陳陳文仲曰錢錢乙字仲陽二氏

醫林夢 卷之五 十一 醫學

陳以熱錢以涼故有火與水喻者劉鳳序朱震亨

曰痘瘡之論錢氏為詳又曰忽得陳氏方論遂以為

錢氏不及陳氏遠矣拾致餘論宋陳文中字文秀宿州維

揚人為和安郎判太醫局兼翰林良醫著小兒痘癩

經驗方金亡歸宋處漣水十五年理宗淳祐中與保

安郎翰林醫正鄭惠卿同編校幼幼新書陳氏又有

小兒病源方論一卷醫學源流

孫思邈曰考諸經方往往有脚弱之論而古人少有

此疾自永嘉南渡衣纓士人多有遭者類表江東有

支法存仰道人等並留意經方偏善斯術晉朝仕望

錢氏傳
出錢乙
黃士條

多獲全濟莫不由此二公又宋齊之間有釋門深師

師道人述法存等諸家舊方為二十卷其脚弱一方

近百餘首魏周之代益無此病所以姚公集驗殊不

慙慙徐王撰錄未以為意特以三方鼎峙風教未一

霜露不均寒暑不等是以關西河北不識此疾自聖

唐開闢六合無外南極之地襟帶是重爪牙之寄作

鎮於彼不習水土往者皆遭近來中國士大夫雖不

涉江表亦有居然而患之者良由今代天下風氣混

同物類齊等所致之耳然此病發初得先從脚起因

即脛腫時人號為脚氣深師云脚弱者即其義也千金

方支法存仰道士共嶺表之僧人也醫說

胤宗一藥 無擇三因

唐許胤宗常州義興人也初事陳為新蔡王外參軍或謂曰公醫術若神何不著書以貽將來胤宗曰醫者意也在人思慮又脉候幽微苦其難別意之所解口莫能宣且古之名手惟是別脉脉既精別然後識病夫病之於藥有正相當者惟須單用一味直攻彼病藥力既純病即立愈今人不能別脉莫識病源以情臆度多安藥味譬之於獵未知兎所多發人馬空地遮圍或冀一人偶然逢也如此療病不亦疎乎假

令一藥偶然當病復共他味相和君臣相制氣勢不行所以難差諒由於此脉之深趣既不可言歷設經方豈加於舊吾思久矣故不能著述耳年九十餘卒

舊唐書

陳言字無擇青田鶴溪人醫學源流紹興辛巳編集應用諸方類分一百八十一門得方一千五十餘道題曰三因極一病源論粹陳言自序三因者內因外因不內外因其說出金匱要畧其所述方論徃徃皆古書也文獻

考通

上善大素 元起始訓

揚上善不知何郡人，大業中為大醫侍御，名著當代，稱神診療，出奇能起沈痾篤疾，不拘局方，述內經為大素，知休咎，今世之云太素脉，皆宗之，鮮有得其妙者。古今醫統黃帝內經太素三十卷，揚上善註。唐經籍志全元起以醫鳴晉，其實不在巢揚之下，一時縉紳慕之，如神，患者仰之，得則生，捨則死，其醫悉祖內經，所著內經訓解行世。古今醫統全元起始訓解黃帝素問九卷。醫說

法善鐵鏡

惟德銅人

唐葉法善有一鐵鏡，照物如水，人有疾病，照見臟腑。

松憲錄

銅人鍼灸圖三卷，晁氏曰：皇朝王惟德撰，仁宗嘗詔惟德考次鍼灸之法，鑄銅人為式，分腑臟十二經，旁注俞穴，所會刻題，其名並為圖法，并主療之術，刻板傳于世。文獻通考

皇甫守一 混康葆真

宋皇甫坦，西蜀夾江人，善醫術，顯仁太后苦目疾，國醫不能瘡，詔募他醫，臨安守臣張備以坦聞，宋高宗召見，問以治身，坦曰：心無為則身安，人主無為則天下治，引至慈寧殿，治太后目疾，立愈，帝喜厚賜之。

無所受令持香禱青城山還復召問以長生久視之術坦曰先禁諸欲勿令放逸丹經萬卷不如守一帝歎服書清淨二字以名其庵且繪其像禁中宋史宋劉混康晉陵人幼遇異人授以咒術治疾輒驗徽宗聞而召之入對稱旨後住茅山賜號葆真冲和先生大明一統志

壽光鷓息 吳普禽戲

後漢冷壽光唐虞魯女生三人者皆與華佗同時壽光年可百五六十歲行容成公御婦人法常屈頸鷓息須髮盡白而色理如三四十時死於江陵後漢書

容成公補導之仙傳事出列

熊頸一作熊經

後漢廣陵吳普隨佗學普依準佗療多所全濟佗語普曰人體欲得勞動但不當使極耳動搖則穀氣得銷血脉流通病不得生譬如戶樞終不朽也是以古之仙者為導引之事熊頸鳩顧引挽腰體動諸關節以求難老吾有一術名五禽之戲一曰虎二曰鹿三曰熊四曰猿五曰鳥亦以除疾兼利號足以當導引體有不快起作一禽之戲怡而汗出因以著粉身體輕便而欲食普施行之年九十餘耳目聰明齒牙完堅同上

周順杉木 嗣明麥稔

醫林夢草 卷之五 醫學

宋鄱陽周順醫有十全之功云古方如聖惠千金外臺秘要所論病源脉證及鍼灸法皆不可廢然處方分劑與今大異不深究其旨者謹勿妄用曾有士人得脚弱病方書羅列積藥如山而疾益甚余令屏去用杉木為桶濯足及令排樟腦於兩股間以脚棚繫定月餘脚健如故

遊齊開覽

北齊馬嗣明者河內人少明醫術博綜經方甲乙素問明堂本草莫不成誦為人診候一年前知其生死武平末從駕往晉陽至遼陽山中數處見榜云人家女病若能差之者購錢十萬諸名醫多尋榜至問狀

不敢下手唯嗣明獨治之其病由云曾以手持一麥穗即有一赤物長二尺似蛇入其手指中因驚怖倒地即覺手臂疼腫漸及半身俱腫痛不可忍呻吟晝夜不絕嗣明即為處方服湯令馳馬往都市藥示其節度前後服十劑湯一劑散比嗣明從駕還女平復如故嗣明藝術精妙多如此隋閔皇中卒於太子藥藏監然性自矜大輕諸醫人自徐之才崔叔鸞以還俱為其所輕

北齊書

可久啓蒙 無已明理

元葛乾孫字可久平江吳人膂力絕倫擊刺戰陣百

家衆技靡不精究及長折節讀書應進士亞選遂不復應試傳藥書坊論有醫學啓蒙醫學入門

成無己金之聊攝人家世儒醫註傷寒論十卷明理論三卷論方一卷同上

子儀脉神 子華醫意

周禮鄭玄註曰神農子儀之術疏云劉向曰扁鵲治趙太子暴疾云云子儀脉神若然子儀周末時人也程子華云醫者理也理者意也藥者瀹也瀹者養也

子華子

巫咸鴻術 伯祖大譽

巫咸堯臣也以鴻術為帝堯醫巫咸山賦序

後漢張伯祖者南陽人也志性沉簡篤好方術診處精審療皆十全為當時所重同郡張仲景異而師之因有大譽醫說

智藏登牀 道度乘輿

隋許智藏者高陽人也祖道幼嘗以母疾遂覽醫方因而究極世號名醫誠其子曰為人子者嘗膳視藥不知方術豈謂孝乎由是世相傳授仕梁官至負外散騎侍郎父景武陵王諮議參軍智藏少以醫術自達仕陳為散騎侍郎及陳滅高祖以為負外散騎侍

郎煬帝即位時致仕于家帝每有所苦輒令中使就詢訪或以輦迎入殿扶登御牀智藏為方奏之用無不效年八十卒于家書

南宋徐秋夫生道度叔嚮皆能精其業道度有脚疾不能行文帝令乘小輿入殿為諸皇子療疾無不絕驗仕至蘭陵太守書

誠齋芋子 彥伯鯉魚

服風藥禁食芋不惟無效亦甚相反揚誠齋語此嘗見人立至于死韋航紀談

荆人道士王彥伯天性善醫尤別脉斷人生死壽夭

百不差一裴曾尚書子忽暴中病眾醫拱手或說彥伯遠迎使視脉之良久曰都無疾乃煮散數味入口而愈裴問其狀彥伯曰中無腮鯉魚毒也其子因贍得病裴初不信乃贈鯉魚無腮者令左右食之其候悉同始大驚異焉酉陽雜俎

朱肱百問 陶華六書

南陽活人書二十卷晁氏曰宋朝朱肱撰序謂張長沙傷寒論其言雅奧非精於經絡者不能曉會頃因投閑設其對問補苴綴緝僅成卷軸作於己巳成于戊子計九萬一千三百六十八字陳氏曰肱以仲景

方論多以類聚為之問答本號無求子傷寒百問方
有武夷張戴作序易此名仲景南陽人而活人者本
華佗語肱吳興人秘丞臨之子中書舍人服之弟登
第仕至朝奉郎直秘閣文獻通考

明陶華字尚文號節菴餘杭名醫幼讀儒書旁通百

氏著傷寒鎖言大行於世正統間被徵引疾歸時論

高之入醫學門節菴六書名瑣言家秘殺車槌一提金截

江網續論是也古今醫統

張華三藥 褚澄四養

晉張華字茂先范陽方城人也學業優博辭藻溫麗

朗贍多通圖緯方伎之書莫不詳覽少自修謹造次

必以禮度勇於赴義篤於周急器識弘曠時人罕能

測之著博物志十篇及文章並行於世晉書上藥養命

謂五石練形六芝延年也中藥養性謂合觀蠲忿萱

草忘憂也下藥除病謂大黃除實當皈止痛也博物志

南齊褚澄字彥通初湛之尚始安公主薨納側室郭

氏生淵後尚吳郡公主生澄淵事主孝謹主愛之湛

之凶主表淵為嫡澄尚宋文帝女廬江公主拜駙馬

都尉歷官清顯善醫術建元中齊太宗為吳郡太守

豫章王感病太祖召澄為治立愈尋遷左民尚書永

元元年卒，追贈金紫光祿大夫。南齊書澄凡療病無貴賤，皆先審其苦樂，榮悴鄉壤風俗水土，所宜氣血強弱，然後裁方用藥。至於寡婦僧尼，必有異乎妻妾之療。醫說褚氏遺書曰：目目鼻口陰尻竅也，臂股指趾也，也。雙乳外腎關也，齒髮爪甲餘也，枝指旁趾附也，養目力者常飽，養目力者常瞑，養臂指者常屈伸，養股趾者常步履。書本

陸宣良書 范文比相

唐陸贄字敬輿，蘇州嘉興人，十八第進士，中博學宏辭，卒贈兵部尚書，謚曰宣。贄放荒遠，常闔戶，人不識。

常飽可

其面又避謗，不著書，地苦瘡癘，祇為古今集驗方五十篇，示鄉人。唐書陸宣公在忠州，裏方書度日，非特假此避禍，蓋仁人之用心也。梁溪漫志

宋范文正公微時嘗慷慨語其友曰：吾讀書學道，要為宰輔，得時行道，可以活天下之命，不然時不我與，則尚讀黃帝書，深究醫家奧旨，是亦可以活人也。公既仕進顯貴，入為執政大臣，出為大帥，其謀謨經畫所活多矣。於醫則固未暇也。君子之重人命，其立志如此。寓簡

蘓耽 橘井 馬湘竹杖

蕪仙公者桂陽人也漢文帝時得道先生灑掃門庭
 修飾墻宇友人曰有何邀迎荅曰僊侶當降俄頃之
 間乃見天西北隅紫雲氤氳有數十白鶴飛翔其中
 翩翩然降於蕪氏之門皆化為少年先生歛容逢迎
 乃跪白母曰某受命當僊被召有期母曰汝去之後
 使我如何存活先生曰明年天下疾疫庭中井水簷
 邊插樹可以代養井水一升橘葉一枚可療一人言
 畢即出門踟躕顧望聳身入雲紫雲捧足群鶴翱翔
 遂昇雲漢而去來年果有疾疫遠近悉求母療之皆
 以水及橘葉無不愈者神仙傳

唐馬湘字自然其先鹽官人世為小吏自然好經史
 攻文學嘗與道侶徧游方外人或有疾告者自然無
 藥但以竹拄杖打患處或以杖指之口吹杖頭作雷
 鳴便愈有財帛謝者固讓不取強與之輒散與貧人
神仙傳

劉觀妄對 符生凶狀

明太醫院判劉公觀常侍太宗左右大暑中上方東
 一帶乃片腦合成者問觀曰此帶如何觀對曰片腦
 性寒傷腎惟有香耳上透命解去按本草云片腦性
 太辛善走故能散熱今劉謂之性寒何也丹溪云龍

腦屬火，諸香皆屬陽，豈有至香之物而反寒乎？噫，劉觀漫言，蓋不學無術之過歟。續醫說

宣城符裏鎮人符助教治癰疽，操心亾狀，病者瘡不毒，先以藥發之，忽一黃衣卒來，持片紙示之，云：陰司追汝以藤杖點其背，符大叫痛，黃衣曰：汝元來也。知痛隨手成大疽而死。醫說

張療聲病 頌記面瘡

洛州有士人患應聲病，即喉中應之，以問良醫張文仲，張經夜思之，乃得一法，即取本草令讀之，皆應至其所畏者，即不言，仲乃錄取藥，合和為丸服之，應時

應聲病諸書不一，泊宅編遷齋閱覽等事，甚詳。

而止 朝野食載

宋蘓頌曰：貝母治惡瘡，唐人記其事，云：江左嘗有高，人左膊上有瘡，如人面，亦無他苦，商人戲以酒滴口中，其面赤色，以物食之，亦能食，多則膊內肉脹起，或不食，則一臂痺焉。有名醫教其歷試諸藥，金石草木之類，悉無所苦，至貝母，其瘡乃聚眉閉目，商人喜，因以小葦筒毀其口，灌之數日，成痂遂愈，然不知何疾也。本經言主金瘡，此豈金瘡之類與？本草綱目

劉彛正俗 周憲救荒 宋劉彛字執中，長樂人，知虔州，以虔俗信巫，無醫藥

集正俗方一卷以教人文獻通考

明洪武初周憲王因念旱澇民饑咨訪野老田夫得草木之根苗花實可備荒者四百四十種圖其形狀著其出產苗葉花子性味食法凡四卷亦頗詳明可據近人翻刻削其大半雖其見淺亦書之一厄也王號誠齋性質聰敏集普濟方一百六十八卷袖珍方四卷詩文樂府等書本草序例

仲光布袍 居中紙囊

明王仲光吳郡人金華戴原禮來吳中為寓客吳人以病謁者每制一方率銀若干仲光時為儒未知醫

也慕而謁焉因咨學醫之道原禮曰熟讀素問耳仲光歸習之三十年原禮後來見仲光談論大駭以為不如恐攘其技於是登堂拜母以定交時仲光雖得紙上語未能用藥原禮有彥修醫案十卷秘不肯授仲光仲光私窺之知其藏處俟其出也徑取之歸原禮還而失醫案悔甚嘆曰惜哉吾不能終為此惠也於是仲光之醫名吳下仲光志不願仕自壞其面貌終身獨居無妻子鬢髻布袍遊行市中賣藥自給續醫說

宋婁居中東號人臨安藥肆金藥白者有子登第以

恩得初品官撰食治通說一卷大要以食治則身治此上工醫未病之一術也趙丞相序畧曰君自幼業醫至是歷八十一寒暑矣錢唐行都多貴人君未嘗出謁卿相王侯之家屢迎之不可致每旦肩輿至藥肆群兒已四集悲啼叫號囂然滿室君皆調護委曲坐良久徐起救視之一以至之先後為序輒為言兒本無疾愛之者害之也如言兒下利時此為脾虛乳食過傷所致惟苦節其乳食微以參朮藥溫其胃即愈矣而愛之者曰兒數利氣且乏非強食莫補其所喪於是曰胃虛不能攝化其氣重傷參朮弗效增以

薑附不已重以金石而兒殆矣胡不以身喻之方吾曹盛壯時日食二升米飯幾不滿欲一日意中微不往則粒米不堪向口何況兒乎予每視君持藥欲授時必諄諄為人開說口幾欲破又為紙囊貯藥各著其說於上使歸而勿忘焉文獻通考

公度氣海 莊綽膏育

唐柳公度年八十九或問之曰吾不以脾胃煖冷物熟生物不以元氣佐喜怒氣海常溫耳唐書

莊綽字季裕清源縣人宋高宗建炎中官至朝奉郎前江南道都總管同幹公事以醫顯於時熟砭炳之

微乃取膏肓腧穴灸法著書作圖刊行于世今附鍼灸四書中是也醫學源流

元化一卷 越人三治

華佗字元化沛國譙人也一名粵游學徐土兼通數經曉養生之術年且百歲而猶有壯容時人以為仙沛相陳珪舉孝廉大尉黃琬辟皆不就精於方藥處齊不過數種心識分銖不假稱量針灸不過數處截七八九若疾發結於內針藥所不能及者乃令先以酒服麻沸散既醉無所覺因刻破腹背抽割積聚若在腸胃則斷截湔洗除去疾穢既而縫合傳以神膏

四五日創愈一月之間皆平復為人性惡難得意且耻以醫見業又去家思歸乃就操求還取方因託妻疾數期不及操累書呼之又勅郡縣發遣佗恃能厭事猶不肯至操大怒使人廉之知妻詐疾乃收付獄訊考驗首服荀彧請曰佗方術實工人命所懸宜加全宥操不從竟殺之佗臨死出一卷書與獄吏曰此可以活人吏畏法不敢受佗亦不强與索火燒之後漢書

趙簡子病五日不知人大夫皆懼於是召扁鵲入視之曰血脉治也而何怪昔秦穆公嘗七日如此而寤

寤而告公孫子輿曰我夢之帝所甚樂帝告我晉國將亂五世不安其後將霸未老而死霸者之子且令而國男女無別後獻公之亂文公之霸而襄公敗秦師於殽而歸縱淫今主君之病與之同不出三日疾必間間必有言矣居二日半簡子寤

號太子死扁鵲曰太子病所謂尸蹙者也夫以陽入陰中動胃纏緣中經維絡別下於三焦膀胱是以陽脉下遂陰脉上爭會氣閉而不通陰上而陽內行下內鼓而不起上外絕而不為使上有絕陽之絡下有破陰之紐破陰絕陽之色已廢脉亂故形靜如死狀

太子未死也夫以陽入陰支蘭臟者生以陰入陽支蘭臟者死凡此數事皆五臟蹙中之時暴作也良工取之拙者疑殆扁鵲乃使弟子子陽厲鍼砥石以取外三陽五會有間太子蘇乃使子豹為五分之熨以八減之劑和煮之以更熨兩脇下太子起坐更適陰陽但服湯二旬而復故故天下盡以扁鵲為能生死人扁鵲曰越人非能生死人也此自當生者越人能使之起爾

扁鵲過齊初見齊桓侯曰君有疾公不應後又見之曰君有病乃可治之公曰卿欲治無病之人以求其

功後又見公越人便走數日病發召越人越人曰初見君病在皮膚鍼灸所及再見君病在血脉湯藥所及今見君病入骨髓司命亦無奈何後數日桓侯乃

史記

王頌易簡 彥脩格致

易簡方一卷陳氏曰永嘉王頌德唐撰增損方三十首咬咀藥三十品市肆常貨圓子藥十種以為倉卒應用之備其書盛行于世

文獻通考

丹溪者婺之義烏人也姓朱氏諱震亨字彥脩學者尊之曰丹溪翁翁自幼好學日記千言稍長從鄉先

生治經為舉子業後聞許文懿公得朱子四傳之學講道八華山復往拜焉益聞道德性命之說宏深粹密遂為專門一日文懿謂曰吾卧病久非精於醫者不能以起之子聰明異常人其肯游藝於醫乎翁以母病脾於醫亦粗習及聞文懿之言即慨然曰士苟精一藝以推及物之仁雖不仕於時猶仕也乃悉焚棄向所習舉子業一於醫致力焉時方盛行陳師文裴宗元所定大觀二百九十七方翁窮晝夜是習既而悟曰操古方以治今病其勢不能以盡合苟將起度量立規矩稱權衡必也素難諸經乎然吾鄉諸醫

醫學叢書 卷之上 二十七 醫學

鮮克知之者遂治裝出遊求他師而叩之乃渡浙河走吳中出宛陵抵南徐達建業皆無所遇及還武林忽有以其郡羅氏告者羅名知悌字子敬世稱太無先生宋理宗朝寺人學精於醫得金劉完素之再傳而旁通張從正李杲二家之說然性褊甚恃能厭事難得意翁往謁焉凡數往返不與接已而求見愈篤羅乃進之曰子非朱彥脩乎時翁已有醫名羅故知之翁既得見遂北面再拜以謁受其所教羅遇翁亦甚懼即授以劉張李諸書為之敷揚三家之旨而一斷於經且曰盡去而舊學非是也翁聞其言渙焉無

少凝滯於胸臆居無何盡得其學以歸卿之諸醫泥陳裴之學者聞翁言即大驚而笑且挑獨文懿喜曰吾疾其遂瘳矣乎文懿得末疾醫不能瘳者殆十年翁以其法治之良驗於是諸醫之笑且挑者始皆心服口譽數年之間聲聞頗著著格致餘論局方發揮傷寒辨疑本草衍義補遺外科精要新論諸書學者多誦習而取則焉史醫

吳大神授 何澄帝賜

吳大昔以泥補首善神後因結屋墜掃折傷腰勢殊亟夢神來云汝昔嘗救我不敢忘授以乳香飲其

方用酒浸虎骨敗龜黃著牛膝草解續斷乳香七品
覺而能記即喚子買藥敬服之一旬愈志已

宋何澄善醫宣和間有一士人抱病經年百治不瘥
其妻聞澄名召至引入密室中告之曰妾以良人抱
疾日久典賣殆盡無以供醫藥之資願以身相酬澄
正色拒之曰小娘子何為出此言但放心當為調治
取效切不可以此言相污萬一外人知之非獨使澄
醫藥不效不有人誅必有鬼責未幾其夫疾愈何澄
一夕夢入神祠有判官語之汝醫藥有功不於艱難
之際以色慾為貪亂良人婦女上帝令賜汝錢五萬

貫官一負未數月東宮得疾國醫不能治有詔召草
澤醫澄乃應詔進劑而愈朝廷賜錢五萬貫與初品
官自後醫道盛行京師號為何藥院家醫說

公茂官祭 蔣武賜諡

明韓公茂蘓州吳縣人遂于醫洪武中金華戴原禮
事上潘邠薦公茂自代初為良醫正永樂元年陞大
醫院判歲餘陞院使小心恭勤上甚重之至是卒遣
官賜祭命以三品禮葬之獻徵錄

淮南蔣用文儒而醫老益精練由戴原禮薦入為御
醫永樂中陞院判極蒙寵異仁宗特加院使賜諡恭

獻徵錄
載作靖

毅國朝太醫院官賜諡唯公一人而已

續醫說

胡洽虛靜 杜度冲深

胡洽者南宋人性尚虛靜心栖至道以拯救為事醫

術知名有經驗方

醫說

後漢杜度者仲景弟子識見宏敏器宇冲深淡於驕

矜尚於救濟事仲景多獲禁方遂為名醫

同上

孫兆四物 海淵一鍼

宋孫兆殿丞治平中間有顯官權府尹忘其名氏一

日坐堂決事人吏環立尹耳或聞風雨鼓角起顧左

右曰此何聲也州吏對以无府尹曰若然吾乃病耳

遽召孫公往焉公診之乃留藥治之翌日尹如故尹

召孫問曰吾所服藥切類四物飲孫曰是也尹曰始

慮為大患服此藥立愈其故何也孫曰心脉太盛腎

脉不能歸耳以藥涼心經則腎脉復歸乃無恙孫之

醫出於衆人皆如是

青箱集

宋僧海淵閬人也工鍼砭天禧中入吳楚游京師寓

相國寺中書令張士遜疾國醫拱手淵一鍼而愈由

是知名

醫說

立興授瓢 世仁撫衾

明陳立興姑蘇蠡口人家貧篤孝因母病遇異人授

以藥瓢方藥濟人如神及卒鄉人立祠祀之醫學入門
 明黃濟之字世仁餘姚人也生兩歲其母不乳鞠於
 祖母馮居常成人父繼娶厲氏生三子愛少陂濟之
 自引罪誓不易子節父惑於厲氏出之外濟之不忍
 號於門往復不內乃勉事醫經以給衣食成化壬寅
 從師出採藥餉夜夢屢驚計父病奔還果深疾諸弟
 避就外舍濟之撫衾哭則自為藥餌用師方損益心
 獨喜不憊可勿為庸醫誤凡數劑而瘥權當道薦入
 春官直尚醫事父母沒廬墓三年奏旌其門曰孝子
 著本草權度三卷醫學入門

慶嗣與米 潤芳懷金

金李慶嗣洛人少舉進士不第棄而學醫讀素問諸
 書洞曉其義天德間歲大疫廣平尤甚貧者往往闔
 門卧病慶嗣携藥與米分遺之全活者甚衆嗣年八
 十餘無疾而終所著有傷寒纂要四卷改證活人書
 二卷傷寒論三卷鍼經一卷傳于世金史
 宋劉潤芳饒州鄱陽人以醫為隱治貧家疾輒懷金
 置席下別時令其家人自得之病者一喜而疾以解
 半其子孫繁盛世傳家業醫學入門

吉老煎冰 克明熾炭

吉老煎冰 克明熾炭

宋徽宗常苦脾疾國醫進藥俱不效遂召楊吉老診視訖進藥帝問何藥吉老對以大理中丸上云朕服之屢矣不驗吉老曰臣所進湯使不同陛下之疾以食水大過得之今臣以水煎此藥欲已受病之原果一二服而愈錄瑣碎

宋王克明字彥昭其始饒州樂平人徙居湖州烏程縣初生時母乏乳餌以粥遂得脾胃疾長益甚醫以為不可治克明自讀難經素問以求其法刻意處藥其病過半愈始以術行江淮入蘓湖鍼灸尤精診脈有難療者必沈思得其要然後予之藥病雖數證或

用一藥以除其本本除而餘病自去亦有不予藥者期以某日自安有以為非藥之過過在其事當隨其事治之言無不驗士大夫皆自屈與遊廬州守王安道風噤不語旬日他醫莫知所為克明令熾炭燒地灑藥置安道于上須臾而獲宋史

汪機會編 江瓘類案

明汪機字省之號石山居士涓之子業春秋補邑庠生習父醫尤得其精妙郡人求治多効日益眾居士弗容辭既而曰仕不至相則其澤之所及不如醫之博也遂棄儒就醫大肆力於素難諸書罔不考訂歷

紀所療為石山醫案編次續素問鈔運氣易覽推求
 師意痘治理辨本草會編等數書行世古今醫統
 明江瓘字民瑩號篁南新都人嘗摺據秦漢以來名
 醫之治驗釐為一書名曰名醫類案而有應宿應元
 二子亦善醫名醫類案

王微倦遊 李調樗散

宋王微字景元琅琊臨沂人太保弘弟子也微少好
 學無不通覽善屬文兼解音律醫方陰陽術數微報
 廬江何偃書云至於平生好服上藥起年十二時病
 虛耳所撰服食方中粗言之矣自此始信攝養有微

故門冬昌朮隨時雜進寒溫相補欲以扶護危羸白
 首家貧乏役至於春秋令節輒自將兩三門生入草
 采之吾實倦遊醫部頗曉和藥尤信本草欲其必行
 是以躬親意在取精世人便言希仙好異宋書
 明李調字孟言錢塘人號樗散生善為詩賣藥金陵
 市咸稱其為知道者醫學入門

程婢放鼈 王生握蒜

程元章婺源游汀人與妻皆嗜食鼈婢梅香主炮飪
 每滋味不適口必撻之嘗得一大者長尺方操刀欲
 屠觀其伸縮顛悸為之不忍指而與言我尋常烹製

少失必遭杖責罰今放汝不殺亦不過痛打一頓遂解縛置於舍後汗池中池廣二丈水亦未嘗竭程夫婦以鼈肥大且滿意飲餐既失之怒甚杖婢數十經二年婢患熱疾發狂奔躁不納粥飲體熱昏憤益陽證也家人知不可療昇入池上茅亭以待絕命明日天未曉聞有扣宅後門扉者謂為鬼物叱之乃言我是梅香病已無事乞令歸家啓關信然問其故對曰半夜後髮髻見一黑物將濕泥草徧覆吾身環繞三四十匝便覺心下開豁四肢清涼全無所苦始知獨在亭子內程氏未以為然迨暮復使往做昨夕偃

類編取
夷堅志
中文書
藥方類
為一編
四川陳
暉撰

卧而密伺察之見巨鼈自池出啣水藻浮萍遮覆其體程不省所以婢詳道本末云鼈比昔日其大加倍視尾後穿竅尚存於是涸池取得之送諸深溪程追悼前過不復食此鄉人聞者相傳以為戒邑醫虞和仲時到彼親見其事為予引霖夢弼言熱證之極悴未可解者汲新井水浸衣裳互熨之為妙不謂水族細微亦能知此蓋陰德所招夷堅志類編石林老人曰今歲熱甚聞道路城市昏仆而死者此皆虛人勞人或飢飽失節或素有疾一為暑氣所中不得泄即關竅皆窒冰暑氣使然氣閉塞而死也古

方治暑無它，但用辛甘發散疏導，心氣與水流行則無害矣。崇寧乙酉歲，余為書局時，一養馬僕馳馬出局下，忽仆地絕急，以五苓大順散灌之，皆不驗。已踰時，同舍王相使取大蒜一握，道上熱土雜研爛，以新水和之，瀉去滓，決其齒灌之，少頃即蘇。至暮，此僕為余復御而歸，乃知藥病相對，有如此者。此方本徐州沛縣市門，忽有板書釘其上，或傳神仙欲以救人者，沉存中王聖美皆著其說，而余親驗之。避暑錄話

嗣伯死枕安常因繩

宋徐嗣伯字叔紹，乃叔嚮之子，文伯之從弟也，亦有

孝行，善清言，位正負郎，諸府為臨川王映所重，嘗有
軀患滯冷，積年不差，嗣伯為診之，曰：此尸注也。當取
死人枕煮服之，乃愈。於是往古冢中取枕，枕已一邊
腐闕，服之即愈。後秣陵人張景年十五，患腹脹面黃，
衆醫不能療，以問嗣伯，曰：此石虵耳，極難療，當取死
人枕煮服之，依語煮枕，以湯投之，得大利，有虵蟲頭
堅如石者五六升，病即差。後沈僧翼患眼痛，又多見
鬼物，以問嗣伯，嗣伯曰：邪氣入肝，可覓死人枕煮服
之，服竟可埋枕於故處，如其言，又愈。王晏知而問之，
曰：三病不同，而皆用死人枕，而俱瘥，何也？答曰：尸注

有鬼氣也。伏而未起，故令人沉滯，得死人枕投之，鬼氣飛越，不得復附體，故尸注可差。石蛻者，久蛔也。醫療既瘳，虻蟲轉堅，世間藥不能遣，所以須鬼物驅之。然後可散，故令煮死人枕也。夫邪氣入肝，故使眼痛，而見魍魎，應須邪物以鈎之，故用死人枕也。氣因枕去，故復令埋於冢間也。太平御覽

蘄水縣高醫龐安時治病無不愈，其處方用意，幾於古人，自言心解，初不從人授也。蘄有富家子，竊出游，值鄰人有鬪者，挑動屋壁，富人子大驚懼，疾走惶惑，突入市，市方陳刑尸，富人子走仆尸上，因大驚到家。

發狂性理遂錯，醫巫百方不能已。龐為劑藥，求得絞囚繩，燒為灰以調藥，一劑而愈。龐得他人藥膏之入口，即知其何物及其多少不差。明道雜誌

藏用斗火 陳承盤冰

蜀人石藏用以醫術游都城，其名甚著。陳承餘抗人亦以醫顯，石好用煖藥，陳好用涼藥。古之良醫必量人之虛實，察病之陰陽，而後投以湯劑，或補或瀉，各隨其證。二子乃執偏見於冷煖，俗語曰：藏用擔頭三斗火，陳承篋裏一盤冰。泊宅編

可大奇勝 劉基多能

明李可大字汝化河南杞縣人與昂同時為諸生因
 母病遂徧覽醫書久之忽大悟曰盧扁在是矣出而
 醫人無不隨手奏効者公用藥好以奇勝不拘舊方
 錄獻微

明劉基字伯溫江浙人天資博學文武全材上窮天
 道下極人文三教九流百技之書過目不忘識天子
 于塵俗中佐太祖開基有大勲不在張良諸葛之下
 封國公食祿三千石辭改封誠意伯常謂民生日用
 之書先五倫次醫方次易數三者為民立身立命之
 本蓋不可以不敷教而廣其傳也集有經効醫方多

能鄙事古今醫統

寄奴收藥 首烏服藤

宋高祖劉裕小字寄奴微時伐荻新州遇一大蛇射
 之明日往聞杵臼聲尋之見童子數人皆青衣於榛
 林中搗藥問其故荅曰我王為劉寄奴所射今合藥
 傳之裕曰神何不殺起曰寄奴王者不可殺也裕叱
 之童子皆散乃收藥而反每遇金瘡傳之即愈南人
 因稱此草為劉寄奴草本草綱目

唐何首烏者順州南河縣人祖名能嗣父名延秀能
 嗣本名田兒生而闡弱年五十八無妻子常慕道術

隨師在山一日醉卧山野忽見有藤二株相去三尺餘苗蔓相交久而方解解了又交田兒驚訝其異至旦遂掘其根歸問諸人無識者後有山老忽來示之答曰子既無嗣其藤乃異此恐是神仙之藥何不服之遂杵為末空心酒服一錢七日而思人道數月似強健因此常服又加至二錢經年舊疾皆痊髮烏容少十年之內即生數男乃改名能嗣又與其子延秀服皆壽百六十歲延秀生首烏首烏服藥亦生數子年百三十歲髮猶黑有李安期者與首烏鄉里親善竊得方服其壽亦長遂叙其事傳之

何首烏傳

知已水解 文潛粥記

此條與本草綱目大同小異可併見也

金麻九疇字知已莫州人三歲識字七歲能草書作大字有神童之目章廟召見問汝入宮殿懼否對曰君臣父子也子寧懼父耶上大奇之從張子和學醫子和以為能得其不傳之妙醫學入門水解云余昔訪靈臺間太史見銅壺之漏水焉太史召司水者曰此水已三環週水滑則漏迅漏迅則刻差當易新水余劃然而悟曰天下之水用之滅火則同濡搗則同至於性從地變質與物遷未嘗固焉故蜀江濯錦則鮮濟源烹猪則滷南陽之潭漸于菊其人多壽遼東之澗

通于淺，其人多髮。晉之山產礬石，泉可愈痘。戎之麓伏硫黃，湯可浴癘。揚子宜菹，淮菜宜醪。滄鹵能鹽，阿井能膠。漂垢以污，茂田以苦。瘳消于藻帶之波，痰破于半夏之如。冰水咽而霍亂息，流水飲而癰闕通。雪水洗目而赤退，鹹水濯肌而癆乾。菜之以為齏，鍼之以為漿。麩之以為酒，蘖之以為醋。千派萬種，言不容盡。至于井之水，一也。尚數名焉。况其他奢乎？及酌而傾，曰：倒流，出甕未放，曰：無根。無時初出，曰：新汲。將旦首汲，曰：井華。夫一井之水，而功用不同，豈烹煮之間，將行藥勢，獨不擇夫水哉？昔有患小溲澁者，衆工不

能瘥。予易之，長川之急流，取前藥而沸之，一飲立溲。九疇聞之，曰：精乎哉！論也。近讀靈樞經，有半夏湯治不眠，以流水千里外者八升，揚之萬遍，取其清五升，炊以葦薪，火正，與此論合。乃知子和之於醫，觸一事一物，皆成治法。如張長史草書，妙天下，得之公孫劍器，用心亦勞矣。後之用水者，當以子和之言為制。余于是乎作水解。偏門事親

宋張文潛粥記贈潘邠老。張安道每晨起食粥，一太盃，空腹胃虛，穀氣便起，所補不細。又極柔膩，與腸腑相得，最為飲食之良。妙齊和尚說山中僧，每將旦一

粥甚繫利害如或不食則終日覺臟腑燥渴蓋能暢胃氣生津液也今勸人每日食粥以為養生之要必大笑大抵養生性命求安樂亦無深遠難知之事正在寢食之間耳

醫說

朱公解毒 許氏救縊

宋朱子云予嘗中鳥喙毒始時頭岑岑然久之加煩懣正如溲于衍毒殺許后之證當時在深山中不能得藥須臾徧身皆黑勢甚危意必死矣偶記漢質帝語得水尚可活亟令人多汲新水連飲之遂大嘔洩而解此亦不可不知也

焦氏筆乘

朱公解毒
毒原出
朱子文集
雜著

明許紳者京師人初供事御藥房嘉靖改元授御醫屢遷大醫院使受知於世宗連加通政使禮部侍郎工部尚書竝領院事二十年宮婢楊金英等謀逆以帛縊帝氣已絕紳急調峻劑下之辰時下藥未時忽作聲去紫血數升遂能言又數劑而愈帝德紳加太子太保禮部尚書賜賚甚厚未幾紳得疾或問之紳曰吾不起矣曩者宮變吾自分不效必殺身因此驚悸非藥石所能療已而果卒賜謚恭僖官其一子邱典有加明世醫者官最顯止紳一人

明史

文摯激怒 郝允怖悸

疾痛史
記作病
發

魏志華
陀傳所
載他治
一郡守
病受貨
不加治
留書罵
守之事
與此亦
相同

齊王疾痛使人之宋迎文摯文摯至視王之疾謂太子曰王之疾必可已也雖然王之疾已則必殺摯也太子曰何故文摯對曰非怒王則疾不可治怒王則摯必死太子頓首彊請曰苟已王之疾臣與臣之母以死爭之於王王必幸臣與臣之母願先生之勿患也文摯曰請以死為王與太子期而將往不當者三齊王固已怒矣文摯至不解屢登牀履王衣問王之疾王怒而不與言文摯因出辭以重怒王王叱而起疾乃遂已呂氏春秋

州監軍病悲思郝允告其子曰法當甚悻即愈時通

守李宋卿御史嚴甚監軍內所憚也允與其子請于宋卿一造問責其過失監軍惶怖汗出疾乃已邵氏錄

張辨青囊 王得金匱

明張鳳翼曰郭景純青囊自是堪輿占筮之術不知後世何緣用之為醫家言考顏弘都傳求蛇膽療嫂不得忽有青衣童子持一青囊授之開視乃蛇膽豈後世因此遂用之醫耶譚輅

宋翰林學士王洙在館閣日於蠹簡中得仲景金匱玉函要畧方三卷上則辨傷寒中則論雜病下則載

其方並療婦人以其傷寒文多節畧故取自雜病以下終於飲食禁忌凡二十五篇除重複合二百六十二方勒成上中下三卷依舊名曰金匱方論

金匱要畧新校

正序

醫林蒙求卷上終

